



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnium Generalium Et Provincialium Collectio Regia

Ab anno MCXVIII. ad annum MCLXXIX.

Parisiis, 1644

Epistola IV. Innocentii Papae II. Ad Wilielmvm Hierosolymitanvm
Patriarcham. In causa Tyriae dioecesis.

urn:nbn:de:hbz:466:1-15588

INNOCENTII PAPÆ II.

AD VVILIELMVM HIEROSOLYMITANVM
PATRIARCHAM.

In causa Tyriæ dicecesis.

*Innocentius episcopus servus servorum Dei venerabili fratri
Vvilielmo Hierosolymitano patriarchæ salutem
& apostolicam benedictionem.*

MAGISTERIVM totius ecclesiæ & ecclesiasticæ institutionis beato Petro apostolorum principi caelesti privilegio esse collatum euangelica declarat auctoritas. *Et infra:* Miramur autem, quoniam cum Romana ecclesia pro liberatione orientalis ecclesiæ tantopere laborauerit, & filiorum multorum sanguinem effundendo, corda tam ecclesiasticorum quam sæcularium ad eius seruitium excitauerit, nequaquam, prout conuenit, eidem matri suæ hac vice respondere curasti: partim enim tibi visum fuerat, quod venerabilem fratrem nostrum Fulcherum Tyrensem archiepiscopum, more prædecessorum suorum pro susceptione pallii ad Romanam ecclesiam venientem disturbare præsumperas, nisi & erga eum a nobis redeuntem te inhumanum difficilemque & nimis asperum exhiberes: adeo quod nec antiquam dignitatem Tyrensis ecclesiæ sibi restituere, nec de damnis sibi illatis, aut etiam de Caipha, siue Porphyria, iuxta mandatum nostrum, infra tres menses post acceptionem nostrarum literarum ei iustitiam facere volueris: cum utique satis indignum sit vt honor qui sibi, si ei obediret, ab Antiochena exhiberetur ecclesia, a te vel tuis successoribus subtrahatur. Præterea in subiectos illius nimis potestatiue diceris te habere. Quocirca auctoritate apostolica mandando tibi præcipimus, sicut eiusdem matris tuæ piis optas studiis atque solatiis confoueri, sicut in tuis necessitatibus eius patrocinii desideras adiuuari, iam dictum archiepiscopum diligas & honores, & in nullo perturbare præsumas: quin potius de omnibus, de quibus apud te querimoniam deposuerit, sibi plenam iustitiam infra quadraginta dies post-

quam præsentia scripta susceperis, exhibere non differas, nec aliquid in subditos suos contra statuta Canonum præsumas: alioquin timendum tibi est, ne tam ipsum quam suffraganeos suos a tua obedientia subtrahamus, eosque in manu nostra retineamus. Data Laterani xvi. Kalendas Ianuarii.

EPISTOLA V.

INNOCENTII PAPÆ II.

AD VVILIELMVM HIEROSOLYMITANVM.

Eiusdem argumenti.

Innocentius episcopus servus servorum Dei Vvilielmo Hierosolymitano patriarchæ salutem & apostolicam benedictionem.

QVANTO munificentia superna benignitas Hierosolymitanam ecclesiam tuis temporibus altius sublimavit, tanto magis expedit personam tuam erga fratres suos humaniorem existere, & eos, qui tibi obedientiam exhibent, caritate mutua honorare. Proinde fraternitati tuæ mandamus, quatenus venerabilem fratrem nostrum Fulcherium Tyrensem archiepiscopum, qui ex mandato sanctæ Romanæ ecclesiæ tibi obedit, fraterni amoris intuitu diligas & honores: solícite providens, ne sibi gravamen aliquod inferas; vel sub obtentu huiuscemodi subiectionis, quæ utique ex beneficentia apostolicæ sedis tibi & ecclesiæ Hierosolymitanæ impenditur, Tyrensis ecclesia nobilis & famosa suæ iustitiæ aut dignitatis patiatum aliquod detrimentum. Indignum est enim ut honor qui sibi, si ei obediret, ab Antiochia exhiberetur, a te vel tuis successoribus subtrahatur. Data Albani decimosexto Kalendas Augusti.